


www.diarioaruba.com
The way business moves!
Diario
Online
 E Matutino di Aruba

Mi certificado pa trabao no ta reconoci

Semper mi tabata tin deseo di tuma les di Enseñanza pa empleo, y awor porfin mi por bay pasobra tin cursonan nobo cu ta bay cuminsa. Nan mes a bisa **"haci uso di e oportunidad aki.. inscribi !!!"** Lagami introduci mi mes, mi number di **Pichin Pancracio Cemen Terio Cipriano Chipan**. Ki contento mi a bira cu e anuncio. Mi por haya les di computer pa principiantenan, pero no por inscribi. Motibo ta cu esnan cu carta di doño di trabao tin cierto preferencia. Kico e **"cierto"** ta mi no sa, pero e preferencia ta bisami caba cu mi number y mi faam no ta di **"cierto preferencia"**. Mi kier a bay anto pa curso di **Excel, of Word, Powerpoint of Access**, pero aki tampoco mi no por drenta. Esnan cu diploma di Enseñanza di empleo tin preferencia. Mi no tin diploma di nan, pues e **"cierto preferencia"** lo no ta pami tampoco. E curso pa **Massage facial**, 17 siman di duracion, no ta yudami, ni traha mi no por traha den e profesion ey pasobra ningun hende lo kier bin tuma masaghi di cara cerca un **"local"**, cu number y faam manera di mi. Nan lo prefera di bay cerca esnan di faam. Tin un curso cu yama **Autocad 1**, pero mi no por tuma esey pasobra mi no tin conocimiento di **Bouwkunde** y mi no por sigui e curso di **Quickbooks** tampoco, pasobra mi no tin conocimiento di **Boekhouden**. Mi a dicidi cu mi lo purba **carpinte fini**, pero pa esaki tambe mi mester tin diploma di Enseñanza pa empleo, locual mi no tin. Tin mas abao curso di **Supervisory Techniques** pa bira un bon supervisor. Nan no a splicami ki tipo di supervisor, y si esaki tin di haber pa supervisa mi señora y mira cu kende e ta sali y ki ora e ta yega cas. Legumai e curso ey, mihor mi tuma e ultimo cu ta **F&B Control**. Con mi por controla Fantochi y Burico, si ta esey nan kier meen cu e F&B? Lolai a contami cu e tin di haber cu algo di cuminda y bebida na hotelnan. Ni pa laba coi kibra nan no tabata kier mi na hotel y ta hopi trapi mi mester subi prome cu mi por yega na bira un fantochi di nan pasobra **"e cursonan ta dirigi riba practica"**, mi no tin practica. Atrrobe mi a perde cursonan di Enseñanza pa Empleo, mi no tin practica, mi no tin diploma, y mi no por haya trabao tampoco pasobra mi mester bay curso pa logra trabao. Mi no tin diploma, ta un certificado mi tin cu ta menciona **"Arubiano"** y e no ta ser reconoci ningun caminda. Mi ta bira choller anto, pasobra ni curso no tin pami.

MI TA HAYA TRABAO OTRO LUNA OF AÑA NOBO

Ta bon cu mi tin bon brother y sisternan cu ta dunami conseho. Nan di cu mi: **"Pichin, bay job fair, ey sigur tin algo pabo"**. Nan a mencionami number di algun hotel cu lo tin trabao pami.. Mensen ! Mi a purba cerca tur di nan varios aña caba. Esun ta tuma peruano, dominicano y colombiano so. E otro ta tuma macamba so, e otronan semper no tin lugar, y si tin lugar mes, semper nan a skirbi mi number y tuma mi datonan, pero ta venezolano, colombiano, filipino, peruano, hamaquino, dominicano y haitiano a haya e trabao. Mi certificado **"Arubiano"** no tin balor di nan diploma **"Stranhero"**. Semper cu mi a reclama, nan a bisami cu nan tabata prome cu mi. Mi brother y sisternan a menciona algun restaurant pero akinan tambe mi a bay, y a resulta cu mi number y mi faam no ta zona **"turisticamente"**. Tin di nan cu a menospreciami y core cu mi asina cu nan a tende mi number. Pa mi mala suerte mi no por a bisti mas netchi tampoco, pasobra mi a bisti lo mihor cu mi tabata tin, y hasta asina mi a keda parce un **"ordinario"**. Mi no por bisti mihor pasobra mi no tin placa pa cumpra mihor. Nan a recomendami pa bay den **"security"**, pero shonnan, mi tin hopi conocir cu a cana e ruta ey, y si tende e storianan so cu nan ta conta, ni Tula y Carpata den tempo di catibo, no a wordo trata asina malo. Mi conocinan a contami di e exigencianan riba bo, cu ni remedi bo por cumpra na botica cu e placa cu bo ta gana, despues cu stress, ulcera y preocupación tirabo abao.

Ta pesey nunca tin suficiente trahador, y semper tin trahador malo di manera cu bo mester traha 16 te 20 ora y bolbe aki 4 ora pa bo warda normal. Pa colmo, ni arma mi no ta haya pa defende mi mes contra esnan cu ta bin atacami. Si bo kier e historia pa yena un buki, papia cu e ex-securitynan. Esey no ta pa mi ! Mi brother y sisternan a recomendami tambe trabao den construccin. Mi a purba cerca casi tur e companianan cu nan a menciona, y aki atrrobe mi no a sirbi pasobra mi no tin **"diploma"** manera tur e stranheronan den construccin. Ta un certificado **"Arubiano"** mi tin, y e no tin balor. **"Si..... Esey nan a yega di bisami"**, sin diploma mi no ta haya trabao y si mi haya mes, ta **"burico humano"** mi mester bira pa hisa bloki.

Mi brother y sisternan a menciona tambe algun compania di carga. Mi tabata cerca nan tambe, pero ta carga mi mester a hisa, sin seguro di bida y sin seguro pa si encaso mi keda mancaron. Otro cu si tin esaki a mustrami papelnan cu ta pone cu den un luna di tempo mi ta riba caya como **"ienvaliede"** manera hulandes ta bisa. Shonnan, mi a purba na algun pacus y boutique, pero aki nan, manera bo drenta, cara di bo coleganan y manera cu nan ta tratabo como nobato, y e zundramento y rousmento di doño of hefe, ta core cu bo, prome bo cuminsa pidi trabao. **"Mi no ta wanta hende gritami por nada pasobra nan tin nervio of stress di trabao. E ora ey mi tambe ta haya stress y perde cabez y respet."** Mi a purba na un panaderia panort aya y aki manera mi a drenta mi a tende doño ta grita trahadornan cu ta haci trabao cu el a comanda nan. Na e boutique pazuid aya, manera mi a drenta mi a tende esun ta bisa e otro, **"nan a pidi trahador, pero tin planea pa Sri Basha Kadim Soorowoebandan drenta caba"**. Ora nan a bisami cu Multi Media tambe ta ofrece trabao, mi a keda contento, pero ni eynan nan no ta tumami. Corda cu ni curso di Enseñanza pa Empleo mi no por a sigui, pasobra mi no tin ningun diploma di computer. Mi certificado no ta sirbi tampoco. Mi ta bay pidi pa **"core stage"** den gobierno. Kizas mi por haya un aña sin traha y djis pa mi siña, cobrando toch 25 mil dollar pa aña. Otmar a papia berdad, haya tur sorto di zundra, a ser humiya, a bira personal contra familia hincando difunto aden, y awor ta resulta cu e tabata tin razon. Mi tambe kier **"core stage"** pasobra trabao no tin pa Pichin Pancracio Cemen Terio Pichan. Ta na Aruba nos ta...

MI NO POR BIRA DOCTER NI CORE STAGE

Ayera Pichin a dicidi cu e ta bay cerca ministro. El a dicidi cu e ta bay pidi pa core stage pa e por haya trabao pasobra tur peticion ta menciona **"mester tin experiencia"**. Su brothernan a consehe pa papia cu ministronan pasobra e por bay core stage na Cuba of na Merca. E no ta costa gobierno nada. Ta solamente 25 mil dollar e ta costa gobierno pa aña pa e core stage cu arquitectonan, mientras cu Pichin lo bay studia pa docter despues. El a bin haya e ministronan bon rabia, pasobra awor nan a haya sa cu lider di partido a balia nan. E lider a forza nan pa bira ministro, siendo cu nan por a bira consultant pa aeropuerto y gana 120 mil florin pa luna, 7 mil pa paga palacio Marisol na huur, 3 mil pa paga supermercado, 3 mil pa alquila un Mercedes pa luna, y na final percursa pa e wordo retira y gana su caso contra gobierno, bahando cu por lo menos 3 miyon di daño y perhuicio. E ministronan tabata bon rabia riba nan lider cu a retira esun di AZV pa busca e mes faam back den aeropuerto. E faam hulandes ta haya trabao mientras e Arends arubiano, cu a gana su caso, no ta afo ainda. Ata e ministronan den pleitamento, pasobra nunca nan lider a bisa nan cu e partido tin **"Plan di Bario"** manera esun berde a bin cune. Ta tur sorto di storia di Cuba, Fidel, comunismo, socialismo, crueldad, falta di derecho humano, mi ore a mester a scucha ayera na telefon. E lectornan a laga sa cu a grita contra cumpramento di mata di coco, y awor a resulta cu tabata pa habri caminda pa termina **"Plan di bario"** di AVP. E plan di bario di ministro di salubridad ta pa tur bario haya un docter di bario, y aki si e pueblo a perde cabez. Nan a core cu e bon docternan, y awor kier trece docter cu ningun hende sa nada di nan. Ta Fidel so a bisa cu nan ta bon. Shonnan, boso a lesa di e desaster cu nan a haci na Venezuela? Ta e brother di Fidel so a bisa cu nan ta bon pa Venezuela. Ta hopi lo tende di esaki e dianan cu ta bin pasobra e ministro mes a bay scucha **"Bro"** di Fidel elogia nan na Venezuela. Ta unda Tico ta? Tempo cu Tico a laga presupuesto di 3.8 miyon pa consultantnan, a grita baha cielo, cu gobierno tin suficiente hefe di departamento y experto y cu gobierno nobo lo elimina consultantnan y coordinadornan, pasobra esaki ta costa gobierno miyones. Awor ta mira riba presupuesto 18 miyon pa consultant y coordinadornan, cu ni experto nan no ta riba e tereno pa cual nan ta nombra. Shonnan, cuida bo faha pasobra fin di otro luna ta hasta bo faha bo lo mester bende pa por cumpra pan na 2004. Gobierno no tin placa !!

Juby Naar